

四庫全書

集部

欽定四庫全書

石倉歷代詩選卷八十六

明 曹學佺 編

晚唐十三

邵謁

金谷園懷古

在富莫驕奢 驕奢多自亡 為女莫騁容 騁容多自傷 如
何金谷園 鬱鬱椒蘭房 昨夜綺羅列 今日池館荒 竹死

不變節花落有餘香美人抱義死千載名猶彰
嬌歌無遺音明月流清光浮雲易改色衰草難重芳
不學韓侯婦街冤報宋王

寒女吟

寒女命自薄生來多賤微家貧人不聘一身無所歸
養蠶徒苦心繭熟他人絲織素徒苦力素成他人衣
青樓富家女纔生便有主終日著羅綺何曾識機杼
清夜聞歌聲聽之淚如雨

古樂府

對酒彈古琴絃中發新音新音不可辨十指幽怨深妾
顏不自保四時如車輪不知今夜月曾照幾時人露摘
芙蓉香香銷心亦死良時無可留殘紅謝池水

經安容先生舊居

羽化留遺跡千載蹤難沒一泉巖下水幾度換明月松
老不改柯龍久皆變骨雲雨有歸時雞犬無還日至今
青山中寂寞桃花發

望行人

登樓恐不高及高君已遠雲行郎即行雲歸郎不返嗟
為樓上人望望不相近若作轍中泥不放郎車轉白日
下西山望盡妾腸斷

覽孟東野集

蚌死留夜光劍折留鋒芒哲人歸大夜千古傳珪璋珪
璋徧四海人倫多變改題花花已無翫月月猶在不知
天地間白日幾時昧

下第有感

古人有遺言天地如掌濶我行三十載青雲路未達嘗
聞讀書者所貴免征伐誰知失意時痛腸復傷骨身如
石上草根蒂淺難活人人愛春暉我獨愁花發何如西
山餓相期采薇蕨

長安寒食

春日照九衢春風媚羅綺萬騎出都門擁在香塵裏莫
辭弔枯骨十載長如此安知今日身不是昔時鬼但看

平地遊亦見推輶死

自歎

春蠶未成繭已賀箱籠實蟪子徒有絲終年不成匹每
念古人言有得則有失我命獨如何憔悴良如一流泉
有枯時窮賤無盡日惆悵復惆悵幾迴新月出

秋夕

萬里憑夢歸骨肉皆在眼覺來益惆悵不信長安遠人
但為農我獨常逢旱惡命如漏卮滴滴添不滿天末

雁來時一叫一腸斷

覽張騫傳

採藥不得根尋河不得源此時虛白首徒感武皇恩桑
田未閒改日月曾幾昏仙骨若求得壠頭無新墳不見
杜陵草至今空自繁

覽鏡

一照一迴悲再照顏色衰日月自流水不知身老時昨
日照紅顏今朝照白絲白絲與紅顏相去咫尺間

放歌行

龜為秉靈亡魚為弄珠死心中自有賊莫怨任公子屈
原若不賢焉得沈湘水

輕薄行

薄薄身上衣輕輕浮雲質長安一花開九陌馬蹄疾誰
言公子車不是天上力

白頭吟

漢家天宇濶日月不暫閒常將古今骨裨作北邱山山

高勢已極猶自凋朱顏

貞女墓

生持節操心死作堅貞鬼至今魂上春草木無花卉

送友人江行

送君若浪水疊疊愁思起夢魂如月明相送秋江裏

漢宮井

輓轡聲絕離宮靜班姬幾度照金井梧桐老去殘花開
猶似當時美人影

李昌符

字嚴夢咸通四年進士

卷八十六

送人出塞

北風吹雨雪舉目已悽悽
戰鬼秋頻哭征鴻夜不栖
沙平關路直磧廣郡樓低
此去非東魯人多事鼓鼙

秋中夜坐

空庭吟坐久爽氣入荷池
病葉先秋落驚禽背月飛
瘴雲晴未散戍客老奚依
為應金門策多應說戰機

旅遊傷春

酒醒鄉關遠迢迢聽漏終曙分林影外春盡雨聲中鳥
思江村路花殘野岸風十年成底事羸馬倦西東

得遠書

故人居謫宦今日一書來良久驚兼喜殷勤閑更開瘴
雲沈去雁江雨促新梅滿紙殊鄉淚沈寃不可裁

送琴客

楚客抱離思蜀琴留恨聲坐來新月上聽久覺秋生夜
靜騷人語天高別鶴鳴因君興一歎竟夕意難平

書邊事

朔野煙塵起天軍又舉戈陰風向晚急朔吹入秋多樹
盡禽棲草冰堅路在河汾陽無繼者黠敵肯先和

題友人屋

松底詩人宅間門遠岫孤數家分小徑一水截平蕪竹
節偶相對鳥名多自呼愛君宜靜者欲去又踟躕

尋僧元皎因贈

此僧迷有著因病得尋師話盡山中事歸當月上時高

松連寺影亞竹入窗枝間憶草堂路相逢非素期

夜泊渭津

飄搖東去客一宿渭城邊迷處星垂岸中流月滿船涼
歸夜深簾秋入雨餘天漸覺家山小殘程尚隔年

贈供奉僧玄觀

自得曹溪法諸經更不看已降禪侶久兼作帝師難夜
木侵檐黑秋燈照雨寒如何嫌有著一念在林巒

寄栖白上人

翦髮薰成隱將心更屬文無慘對豪客不拜謁吾君畫
壁惟泉石經窗半典墳歸林幽鳥狎乞食病僧分默坐
終清夜凝思念碧雲相逢應未卜余正在囂氛

詠鐵馬鞭

長慶二年義成軍曹華進獻且曰得之汴水有字
刻云貞觀四年尉遲敬德字尚在

漢將臨流訝鐵鞭鄂侯名字舊雕鐫須為聖代無雙物
肯逐將軍卧九泉汗馬不侵誅敵血神功今見補亡篇

時來終薦明君用莫歎沈埋二百年

送友人

舉世誰能與事期解攜多是正歡時
人間不遣有名利陌上始應無別離
晚渡待船秋立久辭山投店獨行遲
我今漂泊還如此江劍相逢亦未知

秋夜作

數畝池塘近杜陵秋天寂寞夜雲凝
芙蓉葉上三更雨蟋蟀聲中數點燈
迹避嶮巖翻失路心歸閒澹不因僧

金定四八
卷八十六
既逢上國陳詩日長守林泉亦未能

三月盡日

江頭從此管絃稀
散漫遊人獨未歸
落日已將春色去
殘花應逐晚風飛

悶書

病來難處早秋天
一徑無人樹有蟬
歸計未成書半卷
中宵無夢晝多眠

李山甫

咸通累舉不第
卒有詩一卷

題李員外廳

石砌蛩吟響草堂人語稀
道孤思絕唱年長漸知非
名利終成幻煙霞亦可依
高丘松蓋古間地藥苗肥
猿鳥啼嘉景牛羊傍晚暉
幽棲還自得清嘯坐忘機
愛彼人深處白雲相伴歸

遣懷

長松埋澗底鬱鬱未出原
孤雲飛隴首高潔不可攀
古道貴拙直時事不足言
莫飲盜泉水無為天下先
智者

與愚者盡歸北邙山惟有東流水年光不暫閒

酬劉書記一二知己見寄

見說金臺客相逢祇論詩坐來殘暑退吟許野僧知自
喜幽栖僻惟慚道義虧身閒偏好古句冷不求奇晦跡
全無累安貧自得宜同人終念我蓮社有歸期

夜吟

除却閒吟外人間事事慵更深成一句月冷上孤峰窮
理多瞑目含毫靜倚松終篇渾不寐危坐到晨鐘

春日商山道中作

一逕春光裏，揚鞭入翠微。
風來花落帽，雲過雨霑衣。
谷鳥銜枝去，巴人負笈歸。
殘陽更惆悵，新路客亭稀。

燕

每歲同辛苦，看人似舊情。
亂飛春有信，幽語夜聞聲。
整羽莊姜恨，迴身漢后輕。
豪家足金彈，不用汚雕楹。

題慈雲寺僧院

帝城深處寺，樓殿壓秋江。
紅葉去寒樹，碧峰來曉窗。
煙

霞生淨土苔蘚上高幢欲問吾師語心猿不肯降

聞子規

冤禽名杜宇此事更難知昔帝一時恨後人千古悲斷腸思故國啼血濺芳枝況是天涯客那堪獨聽時

寄太常王少卿

別後西風起新蟬坐卧聞秋天靜如水遠岫碧雲侵稚飲純和氣清吟冰雪文相思望回首梧葉下紛紛

陪鄭先輩華山羅谷訪張隱者

白雲間洞口飛蓋入嵐光好鳥共人語異花迎客香
風聞鼓吹苔石見文章不是神仙侶無因訪阮郎

貧女

平生不識繡衣裳間把荆釵亦自傷鏡裏祇應諳素貌
人間多自信紅粧當年未嫁還憂老終日求媒即道狂
兩意定知無說處暗垂珠淚濕蠶筐

寄衛別駕

曉屐歸來嶽寺深常思道侶集東林昏沈微妙翻經眼

蕭索淨名看病心雲蓋數重橫隴首苔花千點徧松陰
知君超達悟空旨三徑間行抱素琴

方干隱居

交交戛戛水禽聲露洗松陰滿院清溪畔印沙多鶴迹
檻前題竹有僧名問人遠岫千重意對客閒雲一片情
早晚塵埃得休去且將書劒事先生

山中覽書記新詩

記室新詩相寄我靄然清絕更無過谿風滿袖吹花片

巖瀑無聲洒薜蘿雲外山高寒色重雪中松苦夜聲多
久吟獨立無相對蒼鶴羸棲古木柯

滄浪峽

走轂飛蹄過此傍幾人留意問滄浪煙波莫笑趨名客
為愛朝宗日夜忙

下第出春明門

曾知秋雨驅愁入却向春風領恨回深謝灞陵堤畔柳
與人頭上拂塵埃

柳絕句

灞岸江頭臘雪消
東風偷軟入纖條
春來不忍登樓望
萬架金絲著地嬌

終日堂前學畫眉
幾人曾道勝花枝
試看三月春殘後
門外清陰是阿誰

石倉歷代詩選卷八十六

欽定四庫全書

石倉歷代詩選卷八十七

明 曹學佺 編

晚唐十四

崔塗

字禮仙光啓四年進士

秋夕送友人

離心醉豈歡把酒彊相寬
世路須求達還家亦未安
旅程愁算遠江月坐吟殘
莫羨扁舟興功成去不難

晚次修路僧

平盡不平處尚嫌功未深
應難將世路便得稱師心
高鳥下殘照白煙生遠林
更聞清磬發聊喜緩塵襟

夕次洛陽道中

秋風吹故城城下獨吟行
高樹鳥已息古原人尚耕
流年川閣渡往事月空明
不復嘆岐路馬蹄塵夜生

讀方干詩因懷別業

把君詩一吟萬里見君心
華髮新知少滄洲舊隱深
潮

衝虛閣上山入暮窗沈憶宿高齋夜庭枝識海禽

題嵩陽隱者

四十年高夢生涯指一丘無人同久住有鶴對冥修
草雜芝田出泉和石髓流更嫌庭樹老疑是世間秋

江行晚望

木落曙江晴寒郊極望平孤舟三楚去萬里獨吟行
鳥占橫查立人當數里耕十年來復去不覺二毛生

巫山廟

雙黛儼如顰應傷故國春江山非舊主雲雨是前身夢
覺傳詞客靈猶福楚人不知千載後何處又為神

與友人同懷江南別業

因君話故國此夕信依舊業臨秋水何人在釣磯浮
名如縱得滄海亦終歸却是風塵裏悠悠未息機

送道士于千齡遊南岳

物外與誰期人間又別離四方多事日五嶽獨遊時猿
狄瀟湘浦煙波屈宋祠無因陪此去空惜鬢將衰

春日登吳門

故國望不見，愁襟難暫開。
春潮映楊柳，細雨入樓臺。
靜少人同到，晴逢雁正來。
長安遠于日，搔首獨徘徊。

南山旅舍與故人別

一日又欲暮，一年看即殘。
病知新事少，老別舊交難。
山盡路猶險，雨餘春却寒。
那堪試迴首，烽火是長安。

秋日犍為道中

久客厭岐路，出門吟且悲。
平生未到處，落日獨行時。
芳

卷八十七
草不長綠故人無重期那堪更南渡鄉國已天涯

送僧歸天竺

忽憶曾棲處千峰近沃州別來秦樹老歸去海門秋汲帶寒汀月禪隣賈客舟遙思情興愜不厭石林幽

送友人歸江南

渚田芳草徧共憶故山春獨往滄洲暮相看白髮新定過林下寺應見社中人只恐東歸後難將鷗鳥親

過陶徵君隱居

陶令昔居此弄琴遺世榮
田園三畝綠軒冕一鉢輕
衰柳日無主白雲猶可耕
不隨陵谷變應只有高名

江上旅泊

汀洲一夜泊久客半連檣
盡說逢秋色多同憶故鄉
孤岡生晚燒獨樹隱迴塘
欲問東歸路遙知隔渺茫

題絕島山寺

絕島跨危欄登臨到此難
夕陽高鳥迴疎雨一鐘殘
駭浪搖空闊靈山厭渺漫
那堪更回首鄉樹隔雲端

題興善寺隋松院與人期不至

青青伊澗松移植在蓮宮
蘚色前朝雨秋聲半夜風
長閒應未得暫賞亦難同
不及禪栖者相看老此中

南磧耕叟

年年南澗濱力盡志猶新
雨雪朝耕苦桑麻歲計貧
戰添丁壯役老憶太平春
見說經荒後田園半屬人

宿廬山絕頂山舍

一磴出林端千峰次第看
長閒如未遂暫到亦應難
谷

樹雲埋老僧窗瀑影寒自嫌心不達向此夢長安

申州道中

風緊日淒淒鄉心向北迷水分平楚澗山接故關低客
路緣烽火人家厭鼓鼙那堪獨馳馬江樹穆陵西

江上懷翠微寺空上人

旅泛本無定相逢那可期空懷白閣夜未答碧雲詩暮
雨潮生早春寒雁到遲所思吟不見鄉國正天涯

遠望

長為鄉思侵望極即沾襟不是青山色能傷愁客心平
蕪連海盡獨樹隱雲深況復斜陽外分明有返禽

途中感懷寄青城李明府

鱗鬣推殘志未休壯心翻是此身讎併聞寒雨多因夜
不得鄉書又到秋耕釣舊交吟好憶雪霜危棧去堪愁
如何只是三年別君著朱衣我白頭

和進士張曙聞雁見寄

斷行哀響遞相催爭趁秋高作恨煤雲外關山聞獨去

渡頭風雨見初來也知榆塞寒須別莫戀蘋汀暖不迴
試向富春江畔過故園猶合有池臺

途中秋晚送友人歸江南

又指煙波算路岐此生多是厭羈離正逢搖落仍須別
不待登臨已合悲里巷半空兵過後水雲初冷雁來時
扁舟未得如君去空向滄江夢所思

夏日書懷寄道友

達即匡邦退即耕是非何足撓平生終期道向希夷得

未省心因寵辱驚峰轉暫無當戶影雉飛時有隔林聲
十年祇誤吟詩句待得中原欲鑄兵

春夕

水流花謝兩無情送盡東風過楚城胡蝶夢中家萬里
子規枝上月三更故園書動經年絕華髮春惟滿鏡生
自是不歸歸便得五湖煙景有誰爭

櫓聲

煙外曉聲遠天涯幽夢迴爭知江上客不是故鄉來

湖中謠二首

蒼山遙遙江潏潏
路傍老盡沒間人
王孫不見草空綠
惆悵渡頭春復春

煙愁雨細雲漠漠
桂蘭香老三湘清
故山望斷不知處
鷓鴣隔花時一聲

海棠圖

海棠花底三年客
不見海棠花盛開
却向江南展圖畫
始慚虛到蜀城來

泉

遠辭巖竇瀉潺潺靜拂雲根別故山可惜寒聲留不住
旋添波浪向人間

巫山旅別

五千里外三年客十二峰前一望秋無限別魂招不得
夕陽西下水東流

張喬

池州人

送賓貢金夷吾奉使歸本國

渡海登仙籍還家備漢儀孤舟無岸泊萬里有星隨積
水浮魂夢流年半別離東風未迴日音信杳難期

華山

誰將倚天劍削出倚天峰衆水背流急他山相向重樹
黏青靄合崖宿白雲濃一夜盆傾雨前湫起毒龍

滕王閣

昔人登覽處遺閣大江隅疊浪有時有間雲無日無早
涼先燕去返照後帆孤未得營歸計菱歌滿舊湖

寄處士梁燭

賢哉君子風
諷與古人同
採藥楚雲裏
移家湘水東
星霜秋野濶
雨電夜山空
早晚相招隱
深耕老此中

送許棠下第遊蜀

天下猿多處
西南是蜀關
馬登青壁瘦
人宿翠微間
帶雨逢殘日
因江見斷山
行歌風月好
休滯錦城間

弔建州李員外

銘旌歸故里
猿鳥亦悽然
已葬桐江月
空迴建水船
客

傳為郡政僧說讀書年恐有吟魂在深山古木邊

曲江春

尋春與送春多遶曲江濱一片兒鷺水千秋輦轂塵岸
涼隨衆木波影逐遊人自是遊人老年年管吹新

遊華山雲際寺

少華中峰寺高秋衆景歸地連秦塞起河隔晉山微晚
木蟬相應涼天雁並飛殷勤記巖石祇恐再來稀

送鄭谷先輩赴汝州辟命

看花興未休已散曲江遊載筆離秦甸從軍過洛州嵩
雲將雨去汝水背城流應念依門客蒿萊滿徑秋

題靈山寺

樹涼清島寺虛閣敞禪扉四面閒雲入中流獨鳥歸湖
平幽逕近船泊夜燈微一宿秋風裏煙波隔擣衣

經隱巖舊居

住久村落靜徘徊楊柳津青山猶有路明月已無人夢
寐空前事星霜倦此身嘗期結茅處來往躡遺塵

再題敬亭清越上人山房

重來訪惠休已是十年遊
向水千松老空山一磬秋
石窗清吹入河漢夜光流
久別多新作長吟洗俗愁

送友人歸江南

辛勤同失意迢遞獨還家
落日江邊笛殘春塞上花
親安誠可喜道在亦何嗟
誰伴高吟處晴天望九華

江南逢洛下友人

洛下吟詩侶南遊只有君
波濤歸路見蟋蟀在船聞
曉

月江城出晴霞島樹分無窮懷古意豈獨遶湘雲

東湖贈僧子蘭

名利了無時何人暫訪師道情閒外見心地語來知竹
落穿窗葉松寒蔭井枝匡山許同社願卜挂帆期

聽琴

清月轉瑤軫弄中湘水寒能令坐來客不語自相看靜
恐鬼神出急疑風雨殘幾時歸嶺嶠更過洞庭彈

送睦州張參軍

重祿輕身日清資近故鄉因知送君後轉自惜年芳遠
水分林影層峰起鳥行扁舟此中去溪月有餘光

送友人歸宣州

失計復離愁君歸我獨遊亂花藏道發春水遶鄉流暝
火叢橋市晴山疊郡樓無為謝公戀吟過曉蟬秋

思宜春寄友人

勝遊雖隔年魂夢亦依然瀑水喧秋思孤燈動夜船斷
虹金嶺雨斜月半溪煙舊日吟詩侶何人更不眠

吳江旅次

行人愁落日去鳥倦遙林曠野鳴流水空山響暮砧旋
途歸計晚鄉樹別年深寂寞逢村酒漁家一醉吟

郢州即事

孤城臨遠水千里見寒山白雪無人唱滄洲盡日間鳥
歸殘燒外帆出斷雲間此地秋風起應隨計吏還

宿昭應

宿昔開元事淒涼里巷間薄煙通魏闕明月照驪山半

壁空宮閉連天白道閒
清晨更迴首獨向灞陵還

書梅福殿壁

一自白雲去千秋壇月明
我來思往事誰更得長生雅
韻鐘磬遠真風樓殿清
今來為尉者天下有仙名

送友人往江南

落花兼柳絮無處不紛紛
遠道空歸去流鶯獨自閒
野橋喧磴水山郭入樓雲
故里南陔曲秋期更送君

書邊事

調角斷清秋。征人倚戍樓。
春風對青塚。白日下梁州。
大漢無兵阻窮邊。有客遊蕃情似此水。
長願向南流。

送友人許崇

離鄉積歲年。客路遠依然。
夜火山頭市。春江樹杪船。
干戈愁鬢改。瘴癘喜家全。
何處營甘旨。潮波浸薄田。

題鄭侍御藍田別業

秋山清若水。吟客靜于僧。
小徑通商嶺。高窗是杜陵。
雲霞朝入逕。猿鳥夜窺燈。
欲作前峰侶。終來寄上層。

荆楚道中

前程曾未到岐路擬何為
返照行人急荒郊去鳥遲春
宵多旅夢夏閨遠秋期處處牽
愁緒無窮是柳絲

送南陵尉李頻

重作東南尉生涯尚似僧
客程淮館月鄉思海船燈晚
霧看春穀晴天見朗陵不應三
考足先授詔書徵

沿漢東歸

北去窮秦塞南歸遶漢川
深山逢古迹遠道見新年絕

壁雲銜寺空江雪在船縈迴多此景還坐夜燈前

送蜀客

劒閣緣空去西南轉幾州
丹青行客語明月杜鵑愁
露帶山花落雲隨野水流
相如曾醉地莫滯少年遊

塞上

勒兵遼水邊風急卷旌旄
絕塞寒無樹平沙勢盡天
雲晴迴探騎月落控鳴弦
永定山河誓南歸改漢年

藍溪夜坐

藍水警塵夢夜吟開草堂月臨山靄薄松滴露花香詩
外真風遠人間靜興長明朝訪禪侶更上翠微房

江行夜雨

江風木落天遊子感流年萬里波連蜀三更雨到船夢
殘燈影外愁積葦叢邊不及樵漁客全家住島田

將離江上作

白衣歸樹下青草戀江邊三楚足深隱五陵多少年寂
寥聞蜀魄清絕怨湘絃岐路在何處西行心渺然

別李參軍

王孫遊不偶，況我五湖人。
野店難投宿，漁家獨問津。
嶺分中夜月，江隔兩鄉春。
靜想青雲路，還應寄此身。

題湖上友人居

豈得戀樵漁，全家湖畔居。
遠無潮客信，閒寄嶽僧書。
野白梅繁後，山明雨散初。
逍遙向雲水，莫與宦情疎。

題古觀

急景遞衰老，此經誰養真。
松留千載鶴，碑隔六朝人。
洞

水流花早壺天閉雪春其如為名利歸踏五陵塵

題小松

松子落何年纖枝長水邊
斲開深澗雪移出遠林煙帶
月棲幽鳥蕉花灌冷泉微風動清韻閒聽罷琴眠

送友人江上南遊

何處積鄉愁天涯聚亂流
岼長羣岫晚湖澗片帆秋買
酒過漁舍分燈與釣舟
瀟湘見來雁應念獨邊遊

商山道中

春去計秋期長安在夢思多逢山好處少值客行時雲
起爭峰勢花交隱間枝停驂一惆悵應只嶺猿知

寄績溪陳明府

古邑猿聲裏空城只半存岼移無舊路沙漲別成村鼓
角喧京口江山盡汝墳六朝興廢地行子一銷魂

蟬

先秋蟬一悲長是客行時曾感去年者又鳴何處枝細
聽殘韻在迴望舊聲遲斷續誰家樹涼風送別離

江上逢進士許棠

詩人推上第新勝又無君
鶴髮他鄉老漁歌故國聞
平江留曉月獨鳥伴餘雲
且了髫年志沙鷗未可羣

送河西從事

結束佐戎旃河西住幾年
隴頭隨日去磧裏寄星眠
水近沙連帳程遙馬入天
聖朝思上策重待奏安邊

送何道士歸山

身非絕粒本清羸
束掛仙經杖一枝
落葉獨尋流水去

深山長與白雲期
樹圍丹竈寒花發
壇近清風夜月遲
樵客若能隨洞裏
迴歸人世始應悲

題河中鵲雀樓

高樓懷古動悲歌
鵲雀今無野燕過
樹隔五陵秋色早
水連三晉夕陽多
漁人戍火成寒燒
牧笛風吹起夜波
千載重來值搖落
天涯歸計欲如何

對月

盈缺青冥外
東風萬古吹
何人種丹桂
不長出輪枝

河湟舊卒

少年隨將討河湟
頭白時清返故鄉
十萬漢軍零落盡
獨吹邊曲向殘陽

越中贈別

東越相逢幾醉眠
滿樓明月鏡湖邊
別離吟斷西陵渡
楊柳秋風兩岫蟬

宿洛都門

山川馬上度邊禽
一宿都門永夜吟
客路不歸秋又晚

西風吹動洛陽砧

笛

翦雨裁煙一節秋
落梅楊柳曲中愁
樽前暫借殷勤看
明月曾聞向隴頭

宿潺湲亭

走月流煙疊樹西
聽來愁甚聽猿啼
幾時御水聲邊住
却夢潺湲宿此溪

臺城

宮殿餘基長草花景陽宮樹噪村鴉雲屯雉堞依然在
空繞漁樵四五家

寄山僧

閒倚蒲團向日眠不能歸老岳雲邊舊時僧侶無人在
惟有長松見少年

寄維揚故人

離別河邊綰柳條山川無那玉人遙月明記得相尋處
城瑣東風十五橋

寄弟

故里行人戰後疎
青崖萍寄白雲居
那堪又是傷春日
把得長安落第書

鷺鷥障子

翦得機中如雪素
畫為江上帶絲禽
閒來相對茅堂下
引出煙波萬里心

長門怨

御泉長繞鳳凰樓
自是恩波別處流
閒採舞衣歸未得

夜來砧杵六宮秋

贈河南詩友

山東令族玉無塵
裁翦煙花筆下春
不把瑤華借風月
洛陽才子更何人

寄清越上人

子性本來無所染
白雲那得有心期
遠公已刻蓮花漏
獨向空山禮六時

石倉歷代詩選卷八十七

欽定四庫全書

石倉歷代詩選卷八十八

明 曹學佺 編

晚唐十五

許棠

字文化
宣城人

過洞庭湖

驚波長不定半日鬢成斑
四顧疑無地中流忽有山
鳥高還畏墜帆遠却如閑
漁父閒相引時歌浩渺間

登渭南縣樓

近甸名偏著登城景最寬
半空分太華極目是長安
雪助河流漲人耕燒色殘
間來時甚少欲下重凭欄

送李頻之南陵主簿

赴縣是還鄉途程豈覺長
聽鶯離灞岸盪漿入陵陽
野蕨生公署間雲拂印牀
晴天調膳外垂釣有池塘

早發洛中

半夜發清洛不知過石橋
雲增中岳大樹隱上陽
遙塹

黑初沈月河明欲認潮孤村人尚夢無處暫停橈

汝州郡樓望嵩山

不共衆山同宕堯出迴空幾層高鳥外千仞此樓中
澗落難歸地雲離但逐風惟應霄漢客絕頂路方通

將歸江南留別友人

連春不得意所業轉疑非舊國亂離後新年惆悵歸
雪開還楚地花惹別秦衣江徼多留滯高秋會恐違

塞外書事

金定四庫全書
卷八十八
征路出窮邊孤吟傍戍煙河光深蕩塞磧色迴連天殘
日沈鵬外驚蓬到馬前空懷釣魚所未定卜歸年

日暮江上

孤帆收廣岬落照在遙峰南北渡人少高低歸鳥重潮
回沙出樹雨過浦沈鐘漁父雖相問那能話所從

重歸江南

無成歸故里不似在他鄉歲月逐流水山川空夕陽潮
迴迷古渡竹迸過隣牆耆舊來存省寬詞止淚行

寄黔南李校書

從戎巫峽外吟興更應多
郡響蠻江漲山昏蜀雨過
公筵饒越咏土俗尚巴歌
中夜懷吳夢知經滬瀕波

題開明里友人居

城中塵外住入望是田家
井出深山水欄藏異國花
風巢和鳥動雪竹向人斜
來往惟君熟鄉園共海涯

寄盤屋薛能少府

滿縣惟雲水何曾似近畿
曉庭猿集慣寒署吏衙稀
冰

色封深澗樵聲出紫微
時聞迎隱者依舊著山衣

題青山館

境緊殊諸處依然是謝家
遺文齊日月舊井照煙霞
水隔平蕪遠山橫度鳥斜
無人能此隱來往謾興嗟

東歸次采石江

東下經牛渚依然是故關
客程臨岸盡鄉思入鷗閒
雨漲巴來浪雲增楚際山
漁翁知未達相顧不開顏

登凌歊臺

平蕪望已極，況復倚凌歊。
江截吳山斷，天臨楚澤遙。
雲帆高出樹，水市迴分橋。
立久斜陽盡，無言似寂寥。

寄華陰劉拾遺

堅心持諫諍，自古亦艱難。
寄邑雖行化，眠雲似去官。
河分中野斷，岳入半天寒。
瀑布冰成日，誰陪吟復看。

隄囂宮晚望

西顧伊蘭近，方驚滯極邊。
水隨空谷轉，山向夕陽偏。
磧鳥多依地，胡雲不滿天。
秋風動衰草，曠望一潸然。

送厲校書從事鳳翔

赴辟依丞相超榮事豈同城池當隴右山水是關中日
有來已使秋高出塞鴻旬休隨大旆應到九成宮

春夜同厲文學先輩會宿

江漢久分路京闕重聚吟更為他夜約方盡昔年心月
隔明河遠花藏宿鳥深無眠將及曙多是說山陰

泗上早發

獨起無人見長河夜泛時平蕪疑自動落月似相隨楚

外離空早關西去已遲漁歌聞不絕却軫洞庭思

邊城晚望

廣漠杳無窮孤城四面空馬行高磧上日墮迴沙中
暁人移帳當川樹列風迢迢河外路知直去崆峒

白菊

所尚雪霜姿非關落帽期香飄風外別影到月中疑
發在林凋後繁當露冷時人間稀有此自古乃無詩

成紀書事

蹉跎遠入飛塵地
荏苒將成白首翁
三楚田園歸未得
五原岐路去無窮
天垂大野鵬盤草
月落孤城角嘯風
難問開元向前事
依稀猶認隗囂宮

江上遇友人

關下分離日
杏園花半開
江邊相值夜
榆塞鴈初來

章碣

錢塘人

桃源

絕壁相欹是洞門
昔人從此入仙源
數株花下逢珠翠

半曲歌中老子孫別後自疑園吏夢歸來誰信釣翁言
山前空有潺湲水猶遶當時碧樹村

曲江

日照香塵逐馬蹄風吹浪濺幾迴隄無窮羅綺填花徑
太半笙歌占麥畦落絮却籠他樹白嬌鶯更學別禽啼
祇緣頻燕蓬洲客引得遊人去似迷

癸卯歲毗陵會中貽同老

玉皇恩詔別星班去壓徐方分野間有鳥却巢垂汴柳

登樓盡到隔淮山
旌旗漸向行時擁
案牘應從到日閒
想憶朝天獨吟坐
旋攜新作過秦關

雨

低著煙花漠漠輕
正看吟坐掩柴扃
亂沾細網垂窮巷
斜送陰雲入古廳
瑣却暮愁終不散
添成春醉轉難醒
霽來還有風流事
重築南山一徧青

觀賜宴

傾朝朱紫正駢闐
紅杏青莎映廣筵
不道樓臺無錦繡

只愁塵土撲神仙魚銜嫩草浮池面蝶趁飛花到酒邊
日醉驂騑相擁去幾人沈醉失金鞭

城東即事

閒遊香陌鳳城東時暫開襟向遠風玉笛一聲芳草外
錦鴛雙起碧流中苑邊花竹濃如繡渭北山川澹似空
回首漢宮煙靄裏天河金閣未央宮

送謝進士還閩

百越風煙接巨鼇還鄉心壯不知勞雷霆入地建溪險

金匱八十八
星斗逼人梨嶺高却擁木綿吟麗句便攀龍眼醉香醪
名場聲利喧喧在莫向林泉改鬢毛

劉威

早秋遊湖上亭

危亭秋尚早野思已無窮竹葉傾樽酒荷香滿座風
曉煙孤嶼外歸鳥夕陽中漸愛湖光冷移舟月滿空

宿漁家

竹屋清江上風煙四五家水園分芰葉隣界認蘆花雨

到魚翻浪洲迴鳥傍沙月明何處去片片席帆斜

傷春感懷

花飛惜不得年長更堪悲春盡有歸日老來無去時風
前千片雪鏡裏數莖絲腸斷青山暮獨攀楊柳枝

閏三月

三年皆一閏此閏勝常時莫怪花開晚都緣春去遲節
分炎氣近律應蕙風移夢得成胡蝶芳菲幸不遺

旅中早秋

金威生止水爽氣徧瑤空
草色蕭條路槐花零落風夜
來萬里月覺後一聲鴻
莫問前程事颯然沙上蓬

秋日寄陳景孚秀才

征車日已遠物候尚淒淒
風葉青桐落露花紅槿低
心隨秦國遠夢到楚山迷
却恨銜蘆雁秋飛不向西

早秋西歸有懷

求歸方有計惜別更堪愁
上馬江城暮出郊山戍秋
閭銷何限事白盡去年頭
莫怪頻惆悵異鄉難再遊

七夕

烏鵲橋成上界通，千秋靈會此宵同。
雲收喜氣星橋滿，雨拂香塵月殿空。
翠輦不行青草路，金衣徒恨白榆風。
彩盤花閣無窮意，只在遊絲一縷中。

早秋歸

數口飄零身未迴，夢魂遙斷越王臺。
家書欲寄雁飛遠，客恨正深秋氣來。
風解綠楊三畧冷，月當銀漢四山開。
茫茫歸路在何處，砧杵一聲心已摧。

晚春陪王員外東塘遊宴

水綠山青春日長
政成因暇泛回塘
初移柳幄笙歌合
欲過蘋洲羅綺香
共濟已驚依玉樹
隨流還許醉金觴
一聲畫角嚴城暮
雲雨分時滿路光

贈歐陽秀才

桐上知音日下身
道光誰不仰清塵
偶來水館逢為客
舊熟詩名似故人
永日空驚滄海濶
何年重見白頭新
權門要路知無味
閒伴山夫一夜貧

秦韜玉

採茶歌

天柱香芽露香發爛研瑟瑟穿荻箴太守憐才寄野人
山窗碾破團團月倚雲便酌泉聲煮獸炭潛然蚌珠吐
看著晴天早日明鼎中颯颯篩風雨老翠香塵下纔熟
攪時遶筯天雲簇耽書病酒兩多情坐對閩甌睡先足

貧女

蓬門未識綺羅香擬託良媒益自傷誰愛風流高格調

共憐時世儉梳粧敢將十指誇纖巧不把雙眉鬪畫長
苦恨年年壓金線為他人作嫁衣裳

題竹

削玉森森幽思清阮家高興尚分明捲簾陰薄漏山色
欹枕韻寒宜雨聲斜對酒缸偏覺好靜籠碁局最能輕
却驚九陌輪蹄外獨有溪煙數十莖

題刑部李郎中山亭

儂家雲水本相知每到高齋強展眉瘦竹簾煙遮板閣

卷荷驚雨出盆池
笑吟山色同欹枕
閒背庭陰對覆棊
不是主人多野興
肯開青眼重漁師

亭臺

雕楹累棟架崔嵬
院宇生煙次第開
為向西窗添月色
豈辭南海取花栽
意將畫地成幽沼
勢擬驅山作小臺
清鏡漸深官轉重
春時長是別人來

釣翁

一竿青竹老江隈
荷葉衣裳自剪裁
潭曲靜懸絲影直

風高斜颭浪紋開
朝攜輕櫂穿雲去
暮背寒塘戴月回
世上無窮嶮巇事
算應難入釣船來

春雪

雲重寒窗思寂寥
玉塵如糝滿春朝
花纔著地輕輕陷
力不禁風旋旋銷
惹砌任他香粉妬
繁叢自學小梅嬌
誰家醉卷珠簾看
絃管堂深暖易調

鸚鵡

每聞別雁競悲鳴
却歎金籠寄此生
早是翠襟爭愛惜

可堪丹甍強分明雲漫隴樹魂應斷歌按秦樓夢不成
幸自襴衡人未識賺他詞賦被時輕

春遊

選勝逢君叙解攜思和芳草遠煙迷小梅香裏黃鶯囀
垂柳陰中白馬嘶春引美人歌板熟風牽公子酒旗低
早知有此闌身事悔不前年住月溪

燕子

不知大厦許棲無頻已銜泥入座隅曾與佳人並頭語

幾回拋却繡功夫

秦嶺春日玩雪

北闕同雲凍曉霞東風春雪滿山家
瓊章定有千人和
銀樹先開六出花

獨坐吟

客愁不盡本如水草色含情更無已
又覺春愁似草生
何人種在情田裏

殷文珪

行朝早春侍師門宴西溪席上作

西溪水色淨于苔
畫鷁橫風絳帳開
絃管旋飄蓬島去
公卿皆似藥宮來
金鱗擲浪錢翻荇
玉爵粘香雪汎梅
三勝生徒逾七十
豈期龍坂納非才

鸚鵡

丹觜如簧翠羽輕
隨人呼物旋知名
金籠夜黯山西夢
玉枕曉憎簾外聲
才子好文看不足
美人憐爾繡初成
應緣似我邯鄲客
相顧交交別有情

贈戰將

綠沈槍利雪峰尖，犀甲軍裝稱紫髯。
威懾萬人長凜凜，禮延賓客每謙謙。
陣前戰馬黃金勒，架上兵書白玉籤。
不為已為儒子弟，好依門下學韜鈴。

八月十五夜

萬里無雲鏡九州，最團圓夜是中秋。
滿衣冰彩拂不落，遍地水光疑欲流。
華嶽影寒清露掌，海門風急白潮頭。
因君照我中心事，減得愁人一夕愁。

寄廣南劉僕射

戰國從今却尚文
品流才子作將軍
畫船清宴蠻溪雨
粉閣閒吟瘴嶠雲
暴客卸戈歸惠政
史官調筆待儒勲
漢儀一化南人後
牧馬無因更夜聞

經李翰林墓

詩中日月酒中仙
平地雄飛上九天
身謫蓬萊金籍外
寶裝方丈玉堂前
虎靴醉索將軍脫
鴻筆悲無令子傳
十字遺碑三尺墓
只應吟客弔秋煙

邊將別

地角天涯倍苦辛十年鉛槧未酬身
朱門泣別同鮫客紫塞遨遊逐雁臣
漢將出師衝曉雪邊人奔馬撲征塵
行行獨止干戈戚毳帳憑誰是主人

江南秋日

水國由來稱道情野人經此頓神清
一篷秋雨睡初起半硯冷雲吟未成
青笠漁兒筒釣沒蒹衣菱女畫橈輕
冰綃寫上江南景寄與遊梁病馬卿

覽陸龜蒙舊集


先生文價沸三吳白雪千行酒一壺
吟去星辰筆下動醉來嵩岳眼中無
峭如謝檜虬緇活清似緱山鳳引孤
身後讀遺封禪草何人尋得佐鴻圖

趙侍郎看紅白牡丹因寄楊狀頭贊圖

遲開都為讓羣芳貴地栽成對玉堂
紅艷裏煙疑欲語素華映月幾聞香
翦裁偏得東風意澹薄似矜西子芳
雄稱苑中為首冠年年長占斷春光

題湖州太學丘光庭博士幽齋

舜軌堯文混九垓
明重宏構集良材
江邊雲卧如龍穩
天外泥書遣鶴來
五夜藥苗滋沆瀣
四時花影蔭莓苔
草玄門掩山中靜
軒蓋相過暫一開



石倉歷代詩選卷八十八

欽定四庫全書

集部

石倉歷代詩選卷

八十九
九十

詳校官庶吉士臣范逢恩

侍讀臣孫球覆勘

總校官進士臣朱 鈐

校對官中書臣王慶長

謄錄監生臣楊方柱

欽定四庫全書

石倉歷代詩選卷八十九

明 曹學佺 編

晚唐十六

羅隱

字昭諫
餘杭人

思故人

故人不可見
拂衣聊鳴琴
鵲繞風枝急
螢藏露草深
平生四方志
此夜五湖心
惆悵友朋盡
洋洋漫好音

思歸行

不耕南畝田為愛東堂桂身同樹上花一落又經歲交
親益相薄知己恩潛替日開十二門自是無歸計

蘇小小墓

墳居槁李城尚未有人耕好月當年事殘花觸處情向
誰曾艷冶不朽是聲名應待吳王日蘭橈暗送迎

商驛與于韞玉話別

南朝徐庾流洛下憶同遊酒米閒坊菊山登遠寺樓相

思勞寄夢偶別已經秋還被青青桂催君不自由

紅葉

不奈荒城畔那堪晚照中野晴霜裊綠山冷雨催紅遊
子灞陵道美人長信宮等閒居歲暮搖落意無窮

絕境

絕境非身事流年但物華水梳苔髮直風引蕙心斜凡
客從題鳳膚音未勝蛙小船兼有槳姑與問漁家

姑蘇貞娘墓

春草荒墳墓萋萋向虎丘死猶嫌寂寞生肯不風流皎
鏡山泉冷輕裾海霧秋還應伴西子香逕夜深遊

宿彭蠡館

孤館少年旅解鞍增別愁遠山矜薄暮高柳怯清秋病
裏見時態醉中思舊遊所懷今已矣何必恨東流

燕

不必嫌漂露何妨養羽毛漢妃金屋遠盧女杏梁高野
思雙飛急煙情對語勞猶勝黃雀在棲息是蓬蒿

除夜寄張達

梅花已著眼竹葉况粘唇只此留殘歲那堪憶故人
離書不遠衰病日相親江浦思歸意明朝又一春

做玉臺體

青樓枕路隅壁甃復椒塗晚夢通簾押春寒逼酒鑪解
吟憐芍藥難見恨菖蒲試問吟吟多少隣姬亦姓胡

維城作

大鹵旌旗出洛濱此中煙月已埃塵更無樓閣尋行處

金八十一
卷八十九
只有山川識野人，早得鑄金誇范蠡。
旋聞垂釣哭平津。
舊遊難得時難遇，回首空城百草春。

秋日有寄姑蘇曹使君

多病無因棹小舟，闔閭城下謁名侯。
水寒不見雙魚信，風便惟聞五袴謳。
早晚用兵長閭合，近傳觀稼亦閒遊。
須知謝奕依前醉，閒阻清談又一秋。

憶夏口

漢陽渡口蘭為舟，漢陽城下多酒樓。
當年不得盡一醉，

別夢有時還重遊襟帶可憐吞塞雁風煙好是冷江鷗
月明更想曾行處吹笛橋邊木葉秋

金陵夜泊

冷煙輕雨傍衰叢此夕秦淮駐斷蓬
栖鳥遠鷺沽酒火亂鴉高避落帆風
地銷望氣波聲急山帶秋陰樹影空
六代精靈人不見思量應在月明中

繡

一片瀟湘生綠濤洞房西室女工勞
花隨玉指添春色

鳥逐金針長羽毛蜀錦謾誇聲自貴越綾虛說價偏高
可中用作鴛鴦被紅葉枝枝不礙刀

夜泊毘陵無錫縣有寄

草蟲幽咽樹初團獨繫孤舟夜已闌濁浪勢奔吳苑急
疎鐘聲出惠山寒愁催鬢髮凋何易貧戀家鄉別漸難
他日親朋應大笑始知書劍是無端

商於驛樓東望有感

山川去接漢江東曾伴隨侯醉此中歌遶夜梁珠宛轉

舞嬌春席雪朦朧
棠遺善政陰猶在
薤送哀聲事已空
惆悵知音更難得
兩行清淚白楊風

早春送張坤歸大梁

蕭蕭羸馬正塵埃
又送歸軒向吹臺
別酒莫辭今夜醉
故人知是幾時迴
泉經華嶽猶應凍
花到梁園始合開
為謝東門抱關吏
不堪惆悵滿離杯

東歸途中作

村橋蒼黃覆釣磯
早年生計近年違
老知風月終堪恨

貧覺家山不易歸
別岼客帆和雁落
遠程霜葉向人飛
買臣嚴助精靈在
應笑無成一布衣

送舒州宿松縣傅少府

離江漠漠樹重重
東過清淮到宿松
縣好也知臨浣水
官閒應得看瀟峰
春生綠野吳歌怨
雪霽平郊楚酒濃
留取餘杯待張翰
明年歸棹一從容

夏州贈胡常侍

百尺高臺勃勃州
大刀長戟漢諸侯
征鴻過盡邊雲濶

戰馬閒來塞草秋國計已推肝膽許家財不為子孫謀
仍聞隴蜀由多事深喜將軍未白頭

題袁溪張逸人所居

蒲梢獵獵燕差差數里溪光日落時芳樹文君機上錦
遠山孫壽鏡中眉雞窗夜靜開書卷魚檻春深展釣絲
若使浮名拘絆得世間何處有男兒

憶九華

九華巉岬廕柴扉長憶前時此息機黃菊倚風村酒熟

綠蒲低雨釣魚歸
干戈已是三年別
塵土那堪萬事違
回首佳期恨多少
夜闌霜露又霑衣

送丁明府赴紫溪任

金徽玉軫肯躊躇
偶滯良途半月餘
樓上酒闌梅折後
馬前山好雪晴初
樂公社在憐鄉樹
潘令花繁賀版輿
縣譜莫辭留舊本
異時玄度更何如

寄前宣州竇常侍

往年西謁謝玄暉
樽酒留歡醉始歸
曲檻柳濃鶯未老

小園花嫩蝶初飛
歎香瑞獸金三尺
舞雪佳人玉一圍
今日亂離尋不得
滿蓑風雨釣魚磯

柳

灞岸晴來送別頻
相偎相倚不勝春
自家飛絮猶無定
爭解垂絲絆路人

孟浩然墓

數步荒榛接舊蹊
寒江漠漠草萋萋
鹿門黃土無多少
恰到書生塚便低

偶題

鍾陵醉別十餘春
重見雲英掌上身
我未成名君未嫁
可能俱是不如人

羅鄴

隱之弟

窮冬太學

投跡依槐館
荒庭草合時
雪深鳶嘯急
薪濕鼎吟遲
默坐同誰話
非僧不我知
匡廬瀑布畔
何日副心期

陪鄭誠郎中假日省中寓直

憲廳名最重假日許從容牀滿諸司印庭高五粒松井
尋芸吏汲茶拆近僧封鳥度簾旌暮猶吟隔苑鐘

送人宰浦城

東南猶阻寇梨嶺更誰登作宰應無俸歸船必有僧灘
平眠獺石燒斷飲猿藤歲滿功殊最方當見異能

朱坡

朱坡坡上望不似在秦京漸覺溪山秀更高魚鳥情夜
吟禪子室曉爨獵人鐙恃此偷佳賞九衢蛭水鳴

送惠補闕

詔下搜巖野，高人入竹林。
長因抗疏日，便作去官心。
清俸供僧盡，滄洲寄迹深。
東門有歸路，徒自棄華簪。

牡丹

落盡春紅始著花，花時北岸事豪華。
買栽池館恐無地，看到子孫能幾家。
門倚長衢攢繡輓，幄籠輕日護香霞。
歌鐘滿座爭歡賞，肯信流年鬢有華。

冬夕江上言事

葉落纔悲草又青
看看少壯是衰形
關中秋雨書難到
江上春寒酒易醒
多少繫心身未達
淒涼舉目淚堪零
幾時抱犢歸山去
松下看雲讀道經

春日宿崇賢里

柳閣榆飛春日深
水邊門巷獨來尋
舊山共是經年別
新句相逢竟夕吟
枕近禁街聞曉鼓
月當高竹見棲禽
勞歌莫問秋風計
恐起江河垂釣心

征人

青樓一別戍金微力盡秋來破敵圍錦字莫辭連夜織
塞邊長是到春歸正憐漢月當空照不奈邊沙滿眼飛
惟有夢魂南去日故鄉山水路依稀

鶯

暖辭雲谷背殘陽飛下東風翅已長却笑金籠是羈絆
豈知瑤草正芬芳曉逢溪雨投紅樹晚嚶宮樓泣舊粧
何處離人不堪聽灞橋斜日裊垂楊

宿武安山有懷

野店暮來山畔逢寒蕪漠漠露華濃窗間燈在犬驚吠
溪上月沈人罷舂遠別只愁添雪鬢此生何計隱雲峰
離心却羨南飛翼獨過吳江更數重

曲江春望

故國東歸澤國遙曲江晴望憶漁樵都緣北闕春先到
不是南山雪易消瑞影玉樓開組繡歡聲丹禁奏雲韶
雖然未得陪鴛鴦亦酌金觴祝帝堯

流水

漾漾悠悠幾派分中搖短艇與鷗羣天街帶雨淹芳草
玉洞飄花下白雲靜稱一竿持處見急宜孤館寤來聞
隋家柳畔偏堪恨東入長淮日又曛

巴南旅舍言懷

萬浪千巖首未回無憀相倚上高臺家山如畫不歸去
客舍似讎誰遣來紅淚罷窺連曉燭碧波休引向風杯
後時若有青雲望何事偏教羽翼推

僕射坡晚望

離人到此倍堪傷
陂水蘆花似故鄉
身事未知何日了
馬蹄惟覺到秋忙
田園牢落東歸晚
道路辛勤北去長
却羨無愁是沙鳥
雙雙相趁下斜陽

鴛鴦

紅閒碧霽淨煙波
錦翅雙飛去又過
一種鳥憐名字好
都緣人恨別離多
暖依牛渚汀莎媚
夕宿龍墀禁漏和
相對若教春女見
便須攜向鳳凰窠

春閨

愁坐蘭閨日過遲捲簾巢燕羨雙飛管絃樓上春應在
楊柳橋邊人未歸玉筵豈能留舞態金河猶自浣戎衣
梨花滿院東風急惆悵無言依錦機

水簾洞

亂泉飛下翠屏中色共真珠巧綴同一片長垂今與古
半山還聽水簾風雖無舒卷隨人意自有潺湲濟物功
每向暑天來往見疑將仙子隔房櫳

蘆花

如練如霜裊復輕西風處處拂江城長垂釣叟看不足
暫泊王孫愁亦生好傍翠樓裝月色枉隨紅葉舞秋聲
最宜羣鷺斜陽裏閒捕纖鱗傍爾行

長安惜春

千門共惜放春迴半鎖樓臺半復開公子不能留落日
南山遮莫倚高臺殘紅似怨皇州雨細綠猶藏畫蠟灰
畢竟思量何足歎明年時節又還來

下第

謾把青春酒一杯愁襟未信酒能開江邊依舊空歸去
帝里還如不到來門掩殘陽鳴鳥雀花飛何處好池臺
此時惆悵便堪老何用人間歲月催

秋晚

疎星殘月一聲鐘谷際巖隈爽氣濃不向碧臺驚醉夢
但來清鏡促愁容繁金露潔黃籠菊獨翠煙凝遠間松
閒步幽林與苔逕漸移栖鳥及鳴蛩

覽陳丕卷

雪宮詞客燕宮遊一軸煙花象外搜謾把蜀紋當畫展
徒誇湘碧帶春流吟時致我寒侵骨得處疑君白盡頭
從北南歸明月夜嶺猿灘鳥更悠悠

省試臘後望春宮

皇都初度臘鳳輦出深宮高凭樓臺上遙瞻灞澹中仗
凝霜彩白袍映日華紅柳眼方開凍鶯聲漸轉風御溝
穿斷靄驪岫照斜空時見宸遊興因觀稼穡功

洛水

一道潺湲濺暖沙年年惆悵是春過莫言行路聽如此
流入深宮恨更多

春山山館旅懷

山館吟餘山月斜東風搖曳拂窗花豈知驅馬無間日
長在他人後到家

早發宜陵即事

霜白山村月落時一聲雞唱又登岐居人猶自掩關在
行客已愁驅馬遲

雁

暮天新雁起汀洲紅蓼花開水國愁
想得故園今夜月
幾人相憶在江樓

螢

水殿清風玉戶開飛光千點去還來
無風無月長門夜
偏到階前點綠苔

看花

花開只恐看來遲及到愁如未看時
家在楚鄉身在蜀

卷八十九
一年春色負歸期

芳草

曲江岸上天街裏
兩地縱生車馬多
不似萋萋南浦見
晚來煙雨半相和

宮中

芳草長含玉輦塵
君王遊幸此中頻
今朝別有承恩處
鸚鵡飛來說似人

聞子規

蜀魄千年尚怨誰
聲聲啼血向花枝
滿山明月東風夜
正是愁人不寐時

望仙

千金壘土望三山
雲鶴無蹤羽衛還
若說神仙求便得
茂陵何事在人間

放鷓鴣

好倚青山與碧溪
刺桐毛竹待雙栖
花時遷客傷離別
莫向相思樹上啼

驪山

風搖巖桂露聞香
白鹿驚時出遶牆
不向驪山鎖宮殿
可知仙去是明皇

梅花

繁如瑞雪壓枝開
越嶺吳溪免用栽
却是五侯家未識
春風不放過江來

渡江有感

岸落殘紅錦雉飛
渡江船上夕陽微
一枝猶負平生意

歸去何曾勝不歸

題終南山僧堂

九衢終日見南山名利何人肯掩關
惟有吾師達真理
坐看雙樹老雲間

嘉陵江

嘉陵南岸雨初收江似秋嵐不煞流
此地終朝有行客
無人一為棹扁舟

早行

雨灑江聲風又吹扁舟正與睡相宜無端戍鼓催前去
別却青山向曉時

秋怨

夢斷南窗啼曉鳥新霜昨夜下庭梧不知簾外如珪月
還照邊城到曉無

歎別

北來南去幾時休人在光陰似箭流直待江山盡無路
始應拋得別離愁

長安春雨

兼風颯颯灑皇州能滯輕寒與勝遊
半夜五侯池館裏美人驚起為花愁

吳王古宮井

古宮荒井曾平後見說耕人又鑿開
拾得玉釵鐫勅字當時恩澤賜誰來

江帆

別離不獨恨蹄輪渡口風帆發更頻
何處青樓方凭檻

半江斜日認歸人

為人感贈

歌舞從來最得名如今老寄洛陽城
當時醉送龍驤曲留與誰家唱月明

春江恨別

望斷長川一葉舟可堪歸路更沿流
重來別處無人見芳草斜陽滿渡頭

公子行

金鞍玉勒照花明
過後春風特地生
半醉五侯門裏出
月高猶在禁街行

春日偶題城南韋曲

韋曲城南錦繡堆
千金不惜買花栽
誰知豪貴多羈束
落盡春紅不見來

華清宮

殿角鐘殘立宿娃
朝元歸駕望無涯
香泉空浸宮前草
未到春時爭發花

曹松

字夢徵
衡陽人

長安春日

浩浩看花晨六街，揚遠塵塵中一丈日。
誰是晏眠人，御柳舞著水野鶯啼破春。
徒云多失意，猶自惜離情。

慈恩寺貽楚霄上人

在秦生楚思，澹浪接禪關。
塔礙高林鳥，窗開白日山。
樹陰移草上，岸色透庭間。
入內談經徹，空攜講疏還。

南遊

直到南箕下方語漲海頭君恩過銅柱戎節限交州犀
占花陰卧波衝瘴色流遠夷非不樂自是北人愁

答匡山僧贈柳栗杖

栗杖出匡頂百中無一枝雖因野僧得猶畏畏嶽神知畫
月冷光在指雲秋片移宜留引蹇步他日訪峨眉

商山夜聞泉

瀉月聲不斷坐來心益閒無人知落處萬木冷空山遠
憶雲容外幽疑石縫間那辭通曙聽明月度藍關

晨起

曉色教不睡卷簾清氣中林殘數枝月髮冷一梳風
並鳥含鐘語歇河隔霧空莫疑營白日道路本無窮

山中寒夜呈許棠

山寒草堂暖寂夜有良朋讀易分高燭煎茶取拆冰
庭垂河半角窗露月微稜俱入詩人地爭無俗者憎

鍾陵野步

岡扉聊自啓信步出波邊野火吹潤春冰鶴啄穿渚

檣齊驛樹山鳥入公田未創孤雲勢空思白閣年

觀山寺僧穿井

雲僧鑿山井寒碧在中庭況是分巖液同來下石瓶旁
痕終變蘚圓影即澄星異夜天龍蟄應聞說葉經

慈恩東樓

寺樓涼出竹非與曲江賒野火流穿苑秦山疊入巴風
稍離衆葉岸角積虛沙此地鐘聲近令人思未涯

古塚

代遠已難問，累次古城民。田侵不盡客，路踏還平作。
穴蛇分蟄依岡鹿，遶行惟應風雨夕。鬼火出林明。

訪山友

一逕通高屋，重雲翳兩原。山寒初宿頂，泉落未知根。
急雨洗荒壁，驚風開半門。聽君吟廢夜，苦却建溪猿。

秋日送方千遊上元

天高淮泗白，之子趣脩程。汲水疑山動，揚帆覺岸行。
雲離京口樹，雁入石頭城。後夜分遙念，諸峰霜露生。

送左協律京西從事

辟書來幾日遂喜就嘉招
猶向風沙淺非于甸服遙
時平無探騎秋靜見盤鵬
若遣關中使煩君問寂寥

山中

此地似商嶺雲霞空往還
衰條難定鳥缺月易依山
野色耕不盡溪容釣自閑
分因多卧退百計少相關

寄崇聖寺僧

不醉長安酒冥心只似師
望山吟過日伴鶴立多時
溝

遠流聲細林寒綠色遲
菴西蘿月夕重約語空期

金陵道中寄友

忍苦待知音無時省
廢吟始為分路客
莫問別家心
嶠翠藏幽瀑
枝風下曉禽
憶君秋欲盡
馬上秣陵砧

九江暮春

楊柳城初鑠
輪蹄息去蹤
春流無舊岸
夜色失諸峰
影動漁邊火
聲遲話後鐘
明朝迴去岸
誰向北郊逢

贈衡山麋明府

為縣瀟湘水門前樹有苔晚吟公籍少春醉積林開滌
硯松香起擎茶岳影來任官當此境更莫夢天台

塞上

邊寒來所潤今日復明朝河凌堅通馬胡雲缺見鷗砂
中程獨泣鄉外隱誰招迴首若經歲靈州生柳條

邊上送友人歸寧

鄉路穿京過寧心去少同日斜尋濶磧春盡逐歸鴻獨
樹河聲外凝笳塞色中憐君到此處却背老萊風

題甘露寺

香門接巨壘，畫角間清鐘。
北固一何峭，西僧多未逢。
天垂無際海，雲白久晴峰。
旦暮然燈外，濤頭振蟄龍。

貽住山僧

罷講巡巖塢，無窮得野情。
鵬高猶伴鹿，夏滿不歸城。
雲朶緣崖發，峰陰截水清。
何須仍洗耳，惟看白毫生。

弔賈島

先生問九原，謫去為何冤。
已葬離燕骨，難招入劍魂。
旅

墳低却草穉子哭勝猿冥冥如搜句宜邀賀監論

憶江西并悼亡友

前程奈兵阻悔作豫章分芳草未歸日故人多列墳帆
行出岫雨馬踐過江雲此地一樽酒當時應論文

石頭懷古

日月出又沒臺城空白雲雖寬百姓土漸缺六朝墳禾
黍是亡國山河歸聖君松聲驟雨足幾寺晚鐘聞

贈餘干袁明府

一雨西成邑陶家心自清山街中郭分雲卷下湖程公
署聞流水人煙入廢城難忘楚盡處新有越吟生

岳陽晚泊

輕帆下闕流便泊此沙洲湖水撼山影夕陽燒野愁白
波爭起處青嶼或沈浮是際船中望東南幾仞秋

南海旅次

憶歸休上越王臺歸思臨高不易裁為客正當無雁處
故園誰道有書來城頭早角吹霜盡郭裏殘潮當月迴

心似百花閒未得年年爭向被春催

陪湖南李中丞宴隱溪

竹林啼鳥不知秋羅列飛橋水亂流
迸散柳絲回玉勒約開蓮葉上蘭舟
酒邊舊侶真何遜雲裏新聲是莫愁
若值主人嫌晝短應陪秉燭夜深遊

別湖上主人

門繫釣舟雲滿津借君幽致坐移旬
湖村夜叫白蕪雁菱市曉喧深浦人
遠水日邊重作雪寒林曉際別生春

不辭更住醒還醉太乙東峰歸夢頻

崇義里言懷

馬蹄京洛岐復此少閒時老積滄洲夢秋乖白閣期

僧院松

此木韻彌全秋宵學瑟絃空知百餘尺未定幾多年

滕王閣春日晚望

凌春帝子閣偶眺日移西浪勢平花塢帆陰上柳堤

春草

不獨滿池塘夢中佳句香春風有餘力引上古城牆

金谷園

當年歌舞時不說草離離今朝歌舞盡滿園秋露垂

鍾陵寒食日郊外閒遊

可憐時節足風情杏子羹香似冷飴無奈春風輪舊火
徧教人喚作山櫻

己亥歲

澤國江山入戰圖生民何計樂樵蘇憑君莫話封侯事

一將功成萬骨枯

石倉歷代詩選卷八十九